

Sra. Astrid de Cuba-Britten:

Riba tereno Literario Belen Kock-Marchena tin su lugar na Aruba!



ORANJESTAD (AAN) -- Señora Astrid de Cuba-Britten, director suplente di Biblioteca, a hiba palabranan pa haci apertura di e Luna Cultural di Biblioteca Nacional, diahuebs anochi.

Sra. de Cuba-Britten a expresa cu e anochi aki tabata pa rindi homenahe na e gran dama y poeta Belen Kock-Marchena, pa su logronan riba tereno literario.

Sra. de Cuba a splica cu tur aña Biblioteca Nacional tin su actividadnan relaciona cu e luna cultural, cumenzando desde 1982 cu a inaugura e actual edificio di Biblioteca cu e iniciativa aki a nace.

"Belen no ta desconoci pa nos y sigur riba tereno literario e tin su lugar. Nos tur por corda bautismo di su bukinan Vibrashon di Amor, Milagro (Miracle) y recientemente "Den bena di bida-Levensader, y su prome CD compacto titula Alimento pa Alma", Astrid de Cuba-Britten a expresa.

Sra. de Cuba a duna di conoce cu e talento di Belen ta bay mas leu: "E aña aki mi por anuncia for di awor caba cu den luna di november, du-

rante nos festival di buki, Belen lo participa como contador di cuenta".

El a agrega cu Belen a nace na Bonaire na aña 1942, y desde 1948 a bin biba na Aruba.

"Belen ademas ta un mama ehemplar, un esposa dedica, y tambe e ta maestra di school. Belen ta expresa den su poemanan sentimento y ideanan na un manera directo y alavez conmovedor. E imagen cu e ta crea cu palabranan fuerte y real ta bin na mi memoria ora nos scucha 'lamento di un adicto'.

Belen a yega di presenta su poemanan den un anochi cultural, no solamente na Aruba, pero tambe na Bonaire y Curacao y hasta na Hulanda", sra. de Cuba a bisa.

PUBLICACIONAN:

Un coleccion di poesia den nos idioma Papiamentu cu un traduccion na Hulandes, incorpora de e mesun obra aki. Tambe Belen a presenta su prome disco compacto "Alimento pa Alma" cu ta un coleccion di poesia for di su bukinan "Vibrashon di Amor" (1995), "Milagro/Miracle" (1998), "Den bena di bida/Levensader" (2201). Un

bunita obra pa cada Arubiano tin den su cas.

Belen a publica anteriormente:

* Bo t'ei...felicidad? (1989)

Are you there...happiness?

Un coleccion di poesia:

1994: Poesia riba poster: Juffrouw, ik heb een boter meegebracht! Poesia riba poster: E milager

1995: Vibrashon di Amor: un coleccion di poesia

1998: Milagro-Miracle: un coleccion di poesia.

Finalmente, sra. de Cuba a desea Belen Kock-Marchena masha pabien cu su logronan literario, pa cualnan diahuebs anochi Biblioteca Nacional a dune un reconocimiento bon merece.

Na su turno, Sra. Belen Kock-Marchena a haci entrega di un ehemplar y CD di su ultimo produccion "Den bena di Bida" y "Alimento pa Alma", na Biblioteca Nacional, cual a worde ricibi pa sra. Astrid de Cuba-Britten mes.



TELEFONNAN DI DIARIO
826747- FAX 828551